

BELEŠKE

EŠREF VRAŽALIĆ — IN MEMORIAM

Dana 22. septembra 1976, nakon duge i teške bolesti, preminuo je u Sarajevu, u 66. godini života, dr Ešref Vražalić, redovni profesor i prvi nastavnik predmeta Međunarodni odnosi na Fakultetu političkih nauka u Sarajevu.

Pokojni profesor Vražalić rodio se u siromašnoj porodici u Visokom 12. juna 1911. Prije rata završio je geodetski odsjek srednje tehničke škole i službovao je kao geometar u užoj Srbiji i Vojvodini. Ilegalni radnik i učesnik NOB od 1941, pokojni Vražalić ostao je i nakon rata u Jugoslovenskoj narodnoj armiji. Pored vojnog školovanja i odgovornih vojnih dužnosti ispoljio je izuzetan trud i upornost u studiju prava. Diplomirao je na Pravnom fakultetu u Beogradu 1955, a potom je na istom Fakultetu prijavio doktorsku disertaciju. Usmeni doktorski ispit položio je 1960, a doktorsku disertaciju pod naslovom: »Napad na Jugoslaviju i njena okupacija 1941« obranio je 30. marta 1963. godine. Po izlasku iz JNA pokojni dr Vražalić prelazi u Sarajevo. Za docenta iz predmeta Međunarodni odnosi izabran je 1965, za vanrednog profesora 1969, te za redovnog profesora 1974. godine. Nosilac je više ratnih i mirnodopskih odlikovanja. Pored nastavne djelatnosti bio je angažiran i u stručnim i društvenim organizacijama u Bosni i Hercegovini.

Pokojni dr Vražalić relativno se kasno počeo baviti naučnim radom, i to nije ostalo bez odraza na njegove publikacije. I u tome je, međutim, pokazao izuzetnu volju i trud. Pored doktorske disertacije objavio je udžbenik — skripta iz međunarodnih odnosa u dvije knjige: »Razvoj međunarodnih odnosa i međunarodne zajednice i faktori koji utiču na taj razvoj« (1966), te »Dinamika savremenih međunarodnih odnosa« (1968). Bio je to, svakako, u ono doba pionirski poduhvat, kad se nauka međunarodnih odnosa kod nas tek ustanovila i to nije ostalo bez posljedica. U 1975. profesor Vražalić objavio je i knjigu: »Kina i savremeni svijet«. Pisac je i skripata o spoljnoj politici Jugoslavije.

Pokojni profesor Vražalić učestvovao je na brojnim naučnim skupovima i objavio je brojne kraće i duže rasprave na teme iz historije NOB i njihovom odrazu na međunarodne odnose, zatim na različite aktuelne međunarodne teme. Teško bolestan i praktično nepokretan, u zadnjoj godini života, on nije prestao da piše sve dok ga bolest nije sasvim prikovala uz krevet. Ta njegova upornost, marljivost i radoznalost zadivljivale su njegove mlađe kolege.

Pokojni profesor Vražalić bio je veoma obljubljen među svojim kolegama na Fakultetu političkih nauka u Sarajevu. Krasile su ga divne ljudske osobine i tolerancija. Razlike u mišljenjima i u pristupu naučnim problemima nikad nisu bile povod za nesporazume i za loše odnose. Njegovi su ga prijatelji voljeli kao dragog čovjeka i njegov odlazak stvorio je prazninu u njegovom kolektivu.

Prof. dr Vladimir-Đuro DEGAN